




**Verstopfig**  
 Die haubi Wäut hed ehn bestoche  
 esch ehm tüf i Arsch ie kroche  
 Ihr wössid scho, wer das mer meine  
 S'esch wäg de Zöll, es get nor eine  
 Au de Parmelin reist uf Amerika  
 Aber hinde en het's kei Platz meh gha  
 Gäg die Verstopfig höuft im Patiänt  
 us de Schwiiz es gönschtigs Medikamänt




**Friedenspries**  
 Uf de Wäut lauft's vöunenort mies  
 drom vergänd au mer jetz e Friedenspries  
 För bsondri Blödheit ond Ignoranz  
 händ mer aber kei Toleranz  
 Mer gänd üse Priis de Ontelligänte  
 de FIFA- ond Wäutmacht-Präsidente  
 ond allne, wo üs uf d'Närve gönd  
 demit sie üs gfälligscht in Friede lönd



**Shopping**  
 Wenn mer is Ossland goht go poschte  
 daf's scho mol e chli öppis choschte  
 Mer chaft tür i z'America  
 was gönschtig chöntsch z'Europa ha  
 Wenn de di gsalznig Rächtnig chond  
 wärdid d'Augue vom Pfister gross ond rond  
 Ohni welle d'Amherd z'mobbe  
 so goht's wenn Fraue gönd go shoppe




**Mega-Muni**  
 Drei Froue hend im Mai de ESC gschmesse  
 und z'Basel s'grosse Publikum metgresse  
 Im Parlamänt stüige d'Froue ou i d'Hose  
 wöu d'Manne sösch ned uf sie lose  
 Mer het Gäld för Schaf, Reh und Gäms  
 aber bi Frouefrage giltet d'Schuldebräms  
 Uf d'Froue sind mer halt weniger stolz  
 als uf de Mega-Muni Max us Holz



**Grillchef**  
 Wäg em EU-Onderwärgsvertrag  
 trifft de SVP-Dettling fascht de Schlag  
 Är verbrönnt das Machwärk am 1. August  
 ond brötlet dröber Cervelat im Fruscht  
 Besser passt ihm de Deal mit de USA  
 Är brucht de d'Hellebarde nöm för d'Cervelat  
 sondern cha frömdländischs Grillguet ufspiesse  
 ond es amerikanisches Chlorhuen gniesse



**So nes Päch**  
 Im Louvre z'Paris passiere ungloublechi Sache  
 über de Roub muess mer scho fascht lache  
 Chum send's e wäg, d'Kronjuwele uf s'Smaragd  
 wärde Diebe gfasst ohni grossi Verfolgigsjagd  
 Die Schmuckstück bliibe verscholle z'Paris  
 z'Rom onde miech niemmer sones Gschiis  
 Im Vatikan het säute öpper öppis gstohe  
 det git's nome verchnöchereti Manne z'hole




**Für immer toxisch**  
 Die schädliche Ewigkeitschemikalie  
 si för d'Wäut ned öppe e Lapalie  
 Bös si d'Uswirkige uf s'künftige Läbe  
 bliibe a Mönsche, Tier und Pflanze chläbe  
 Ou d'Chele prediget vo de Ewigkeit  
 und gsed ned, was alles abverheit  
 Zvöu Chemie im Wasser esch z'beduure  
 ou s'Zöllibat isch Gift und wird ewig duure



### Gold-Reflex

D'Cheleustritt zehre a de Substanz  
und verursache mäenge Eiertanz  
Ohni Stüüre müesste mer d'Üebig abbräche  
drum muess d'Chele ou afaa bestäche

Mer übereänd em Trump sine grosskotzed Stil  
Und mache met de Lüüt e very good Deal  
Jedes Chind, sig's d'Bettina oder de Alex  
überchunnt bi de Taufi e goldigi Rolex



### Werbefachmanne

Mer seid, dass Politiker chorzichtig sind  
oder uf em lingge oder rächte Aug blind  
Dass de Marco jetz Wärbig für Brölle macht  
heisst aber ned, dass ehm d'Politkarriere lacht

Vielleicht esch de Odermatt Wärbefachma  
für Sache, wo'd ned wirklich muesch ha  
Die Wärbig haut i die glichlig Chärbe  
wie wenn de Papst für Parship wörd wärbe



### Lozärn first

Fascht möched d'Lozärner de glichlig Seich  
wie d'Amerikaner ännet em Teich  
Mer aber händ de Shutdown verhinderet  
S'Budget g'körtzt ond d'Usgabe gminderet


Üsi fuf Magistrate ond s'Parlamänt  
sind schläuer as d'Amis samt Präsidiänt  
Doch onder üs gseit ond ganz ohni Gwähr  
esch das au ned osennig schwär



### Wer suecht, dä findet (ned immer)

Vöu im Läbe esch fascht onerreichbar  
ganz schwierig z'finde, säute ond rar:  
Inners Glichgwich, ewigi Fröndschaft  
für jede schträng Täg die nötig Chraft

Au Zfrideheit ond Glöck im Läbe  
suecht mäenge verzweiflet ond vergäbe  
Doch niene git's e grössere Schatz  
as i de Stadt Lozärn e freie Parkplatz



### Verkehrfluss

I de Schwiz isch's e truurigi Realität  
eländ schlächt isch d'Spermiequalität  
Nome s'paar Priester hend guete Same  
und schwängere hie und da e Dame

Im Aargau sig Spermiequalität die bescht  
säge wüesseschaftlich fundierti Tescht  
Det touge d'Manne no für d'Familieplanig  
aber vom Verkehr hei d'Aargauer kei Ahnig



### Vom Himmel hoch...

Es get z'vöu Krieg uf dere Wält  
Natione Kämpfe um Macht und Gälde  
De Liebgott stöhnt: d'Mönsche hend e Knall  
so han ich sie ned erschaffe – im Fall!

Z'Europa gseit me i verschiedene Regione  
am Himmel gheimnisvolli Drohne  
Das send ned die vom Putin, däm Struube  
sondern em Liebgott sini elektrische Friedenstuube

### Nömmegsond

De Kanton Zug sorgt sech us guetem Grund  
d'Hecht und d'Egli im Zugersee sie nömmegsond  
Ihre Bundesrat, de Pfischter, isch enorm im Stress  
Er realisiert: Versücht isch ou sis VBS.

### Frühfranzösisch

S'paar Kantön wend s'Frühfranzösisch abschaffe  
d'Chend sölle sich fürs Düütsch und Änglisch ufraffe  
I de katholische Chile wäiht en andere Wind  
det verkehrt mer gärn uf französisch mit de Chend

### E wöude Wälleritt

Vo UKW zo DAB ond weder zrogg zo UKW  
Vo dem wöude Wälleritt tued mer mine Chopf scho weh  
Mer frogid üs: Wo füert das hi? Ihr Röt vo Bärn, was wänder?  
Ihr wössids ned? Wahrschijnlijk händer, alli eine am Sänder

### PFAS

Studie zeiget, s'isch afig richtig schlim  
im Ässe ond öberall hed's Schadstoff drin  
Jetz hed mer sogar – d'Chile isch ufgschreckt –  
im Wiewasser Ewigkeitschemikalie entdeckt

### Refrain

Vo Wäggis bis uf Willisau  
vo Flüeli bis uf Aesch  
Es sengid, tanzid alli Lüt  
es esch es grosses Fäschd  
S'Fasnachtsvirus grift um sich ond steckt üs alli a  
Mer impfd üs mit Holdrio, das höuft vo Frau bis Ma

### Zeichnungen:

